

Pôvès coméres !

Ça fait d'dja on p'tit timps qu'on-z-ètind tos lès djôus
Causer d' cès bandits là qui faîyenu vosse maleûr,
Qui vos n' sowaîterîz nin d' lès r'trover su vosse choû,
Qui profitenut d' vosse cwârps tot nèglidjant vosse keûr.
Dès-omes qui v's-ont mètu dins dès sâcrès laîds draps
Tot profitant d' leû place di patron ou d' grand maîsse ;
Dès-omes ? Mi, dji lomereu putôt ça dès boûrias,
Jamaîs au grand jamaîs qui n' si d'manderin.n' : « Qui faîs' ? »
I paraît qu'i-gn-a d's-ôtes qui n' tûzenut qu'à s' froter
Aler j'qu'à v' carèssî, rètassîyes conte n-on-l'ôte
Su l' trin ou l'autobus', prinde ça come po djouwer,
Fé mau à vos raîsons, è pâti d'esse à l' môde !
Mins ci r'mûwe-mwin.nadje là, do côp, qu'on n' cause qui d' ça,
Â si d'mander, vormint, dispû qui l' monde èst monde
Si c'èsteut l' fin parèy, mins qu'on d'mèreut moya
Èt qui, d'on djoû à l'ôte, c'est tot l' monde qui s'ènonde.
C'èst l' mwaîs costé d' l'afaîre, èt si dj' so disgosté
Di veûy comint qu'on traîte dès bauchèles, dès coméres,
Maugré qui dj' so-st-on' ome, i nos faut raviser
Èt s' dire maugré tot ça qu'on-z-a raîson d'esse fiér.
One feume qu'èst bin riv'nante, lî dire qu'èle vos plaît bin,
Èst ç' qui c'è-st-on pètchi ? Gn-a dès chances qu'èle sorîye ;
Lès-omes come lès coméres, tot compte fait, c'èst dès djins
Qui vont si bin èchone, i n' faut nin qu'on l' rovîye.
Passans yute di tot ça ! Gâter s' taute por on' ou,
C'èst r'niyî qui l' boneûr, d'onk à l'ôte, ça s' paurtadje ;
D'on costé come di l'ôte, s'on fait chake ci qu'on pout,
Ça fait byin pus plaîji qui tos leûs fôs ramadjes.
I nos faureut r'tûzer qui l' tot prumî pètchi
Qui nos-è payans co lès pots câssés asteûre,
Li pome, c'èst-one comére, Ève, què l'a fait r'glati
Po tenter l' pére Adam què l'a crochî d' bon keûr !

Albert Delvaux
janvier 2018